

四庫全書

集部

欽定四庫全書

集部

至正集

目錄
卷一
至

詳校官編修_臣錢樾

侍讀_臣孫球覆勘

總校官降調編修_臣倉聖脉

校對官修撰_臣戴衢亨

謄錄監生_臣楊武鏞

欽定四庫全書

集部五

至正集

別集類四元

提要

臣等謹案至正集八十一卷元許有壬撰有壬字可用湯陰人延祐二年進士歷官集賢大學士中書左丞兼太子左諭德致仕卒謚文忠事迹俱元史本傳有壬立朝五十年三入政府于國家大事侃侃不阿多有可紀文

章亦雄渾闊肆歷切事理不為空言稱元代
館閣鉅手所著至正集本一百卷據其弟有
孚圭塘小稿序云門生集錄繕寫方畢先生
捐館猶子太常博士楨忽遣起遣倉皇之際
輕身南行書籍棄擲稿亦俱亡是其集自有
壬既沒即以淪佚無傳明宏治間其五世孫
顥刊行圭塘小稿時亦未之見故葉盛水東
日記載顥嘗言先公至正集一百卷遺失久

矣聞楊少師嘗收有副本就叔簡少卿求之
少卿云書籍在太和有無未可知也此本不
知何時復出而尚闕其十九卷據黃虞稷千
頃堂書目所載卷數正同蓋相傳祇有此本
其即楊士奇家所藏歟中如箋表傳狀書簡
諸體並闕又有錄而失其辭者詩十一篇樂
府八篇有乎序有稱其論天下事嘉言讜論
見至正集而此本疏稿實無一篇則其散佚

者亦復不少然觀元史本傳載有壬於泰定

初言特們德爾

原作帖木迭兒今改正

之子索南

原作鋪南

今改正

與聞大逆乞正典刑平章政事趙世延

受禍尤慘為辨冤復職及上正始十事諸大

端皆見是集公移類中亦足窺見崖畧而其

論特克什

原作帖實今改正

之妹勿令汙染宮壺更

人所難言本傳顧未之及是尤可以補史闕

矣乾隆四十六年十月恭校上

總纂官

臣

紀昀

臣

陸錫熊

臣

孫士毅

臣

陸費墀

總

校

官

臣

陸

費

墀

欽定四庫全書

集部五

至正集目錄

別集類四
元

卷一

古賦

卷二

古詩

卷三

古詩

卷四

古詩

卷五

古詩

卷六

古詩

卷七

古詩

卷八

古詩

卷九

古詩

卷十

古詩

卷十一

古詩

卷十二

律詩

卷十三

律詩

卷十四

律詩

卷十五

律詩

卷十六

律詩

卷十七

律詩

卷十八

律詩

卷十九

律詩

卷二十

闕

卷二十一

律詩

卷二十二

律詩

卷二十三

絕句

卷二十四

絕句

卷二十五

絕句

卷二十六

絕句

卷二十七

絕句

卷二十八

絕句

卷二十九

絕句

聯句

卷三十

序

卷三十一

序

卷三十二

序

卷三十三

序

卷三十四

序

卷三十五

序

卷三十六

記

卷三十七

記

卷三十八

記

卷三十九

記

卷四十

記

卷四十一

記

卷四十二

記

卷四十三

記

卷四十四

碑志

卷四十五

碑志

卷四十六

碑志

卷四十七

碑志

卷四十八

碑志

卷四十九

碑志

卷五十

碑志

卷五十一

碑志

卷五十二

碑志

卷五十三

碑志

卷五十四

碑志

卷五十五

碑志

卷五十六

碑志

卷五十七

碑志

卷五十八

碑志

卷五十九

碑志

卷六十

碑志

卷六十一

碑志

卷六十二

碑志

卷六十三

碑志

卷六十四

碑志

卷六十五

說

卷六十六

誄

傳

解

銘

箴

卷六十七

贊

卷六十八

頌

辭

卷六十九

文

卷七十

詔

制

表

箋

疏

啟

卷七十一

題跋

卷七十二

題跋

卷七十三

題跋

卷七十四

公移

卷七十五

公移

卷七十六

公移

卷七十七

公移

卷七十八

樂府

卷七十九

樂府

卷八十

樂府

卷八十一

樂府

欽定四庫全書

至正集卷一

元 許有壬 撰

古賦

慶雲賦 并序

至治元年八月十一日仁宗繪像至自灤都有司備
禮迎置萬安寺時有慶雲見百官無不見者有壬在
班簿後獨以不見為恨泰定二年十一月十五日皇

上御興聖宮命百官迎英宗像仍置萬安寺神馭至
門百技馳進東南抱日五色雲見觀者驚嗟竣事方
散有壬陪中書僚屬立衛士廡下始身見之信乎其
為非煙非霧郁郁紛紛者也叅議王公繼學作頌志
之二聖之靈皇上之瑞發揮悉矣有壬以不見於昔
而見於今為幸忘其鄙陋亦作賦以紀之其辭曰

昔軒后之御九五也國當淳興伊雲其禎事以斯紀官
亦斯名礪萬世其未熄宛目擊乎瑞精逮重華之大聖

復昭格之有徵百工相和而作歌爛漫漫乎莫形匪至
理之丕應孰天休之或承聖王不作世降道傾治功鮮
効於乘水嗣德罔至於山陵於是為霾為霧為露為氛
或黑兆水或赤象兵喪則示白蟲則著青遂使書物辨
稊有保章氏者出而天人一致之理委太空於冥冥於
皇我元神功即天仁宗大孝視虞舜而不愧英宗勇智
顧成湯而無前是宜聖德之攸著同一揆於後先時也
鼓吹雷動從官駿奔翠幢搖曳於鳳闕霓旌晻霭乎龍

津才山之木雖拱天日之表方新旄倪揮涕以哽咽盛
美觸目而俄臻爾乃萋菲歲蕤蕭索輪囷綺藻成畫繁
縟有倫錦裂繡褫紅鮮翠勻鏤金鍛玉翔鸞躍鱗動如
海潮靜如漪淪碎如袞闌密如絲棼始炳丹以紺飾脩
霞披而電分備五采以為絢變百態於氤氲攬倬指以
莫狀竭般力而徒勤豈天孫之獻技播大巧於元鈞焜
耀璇極浮動紫宸天章下賁萬物為春予以示九重之
上瑞予以彰二聖之至神螻蟻小臣今見昔聞言之不

足喜極沾巾從而為之歌曰天恒有雲兮惟慶則希軒
虞世遠兮後孰有之我元二見兮天豈我私至德交感
兮符杜莫違千秋萬歲兮比我烝黎

迷樓賦

予總鰲政廣陵禱雨雷塘掾曹汝霖從歸途談江都
廢興荒煬始末周覽山川闐闐樓居之盛而又及迷
樓焉傷而賦之其詞曰

有樂不縣積塵斷絃有美不御老醜備前於是前星掩

乎其無光少海一變而為田矣天厭隋祚憂不在敵胎
於心腹成於肘腋以五子一母列據雄鎮為可恃而不
知大都耦國為禍之尤劇方荒場之好學接士也固莫
辨其真偽及其留麗華而怒高頴則惡緒已暴於中外
惜猛虎之不知竟為毛間蟲之所噬黃腸甫湊金合已
賜麀聚居廬龍飛天位弛然自放於九重之上天地萬
物無一物之可畏遂肆心於巡狩傳粉深宮笑江東之
諸帝車轍馬跡將徧九州北巡榆林既讐其酋耀兵河

右躋武東陬引汴水開邗溝置離宮造龍舟伊江都之
勝麗詎一豫而一游天亦厭乎我民欲一旦而盡劉百
萬億之蚩蚩乃生項昇之巧卒倖般於心匠委財幣於
電掃按圖締構不日成之璇室愧陋摘星笑卑傾宮謝
侈阿房讓奇章華姑蘇撮土何施建章栢梁廣猶可稽
叔寶三閣華而不微軼古罔後舉莫我夷於物靡曼於
粲玕瑰寶帳散愁而延月復有酣香而忘歸亂晝夜於
多景鬱煙霧之霏霏晶瑩奪目孰辨遠邇縈紆倚足曷

明東西巢燕亦惑乎網戶車羊尤眩乎竹枝弄臣肆誤以資喙阿媼雖習而猶疑入者罔識其所從出者莫省其所蹊一蟻逐肉林之臭一蜂億花島之飛蠅遭拍浮而醉不可解舟入溟濤而維無所施又如鷺鷥不能悉鄧林之樹小鮮豈暇窮滄海之涯俊娥熟何妥之車錫名實來夢之兒下俚稚女孰究其姓字如侯夫人之死者蓋漫不知吁嗟獨夫心蕩神疲尚能名之可謂曰迷昔在帝堯法官是作舜闢四門以撤壅遏明堂政令辟

雍禮樂究義資訓德修罔覺遠不軌與不物實儀刑之
攸託三苗義和昏迷致兵政教不迷在書可徵威儀卒
迷詩具刺懲盤盂几杖微且有銘異哉茲樓以惡著稱
謂真仙亦迷於此地何處通突至不迷于厥行向使中
原無叛天復假齡殆將作七千五百里之臺而盡糜天
下之蒼生矣人不知過或肆無忌苟知其非敢作而遂
觀其引鏡念頭頭之且所觀天識圖儂之將至既灼然
而自知乃確乎其自棄蓋柔終而無改過之勇厚極而

有難開之蔽迷於心者若是其大迷於樓特其細也高
岸為谷深谷為陵樓傾土平傷哉蕪城乃為之歌曰蕪
城蕭蕭兮草離離繁華漸盡兮瓦礫不遺昔之迷不可
復兮無俾世迷

弄田賦

元統甲戌有壬承乏中臺嘗與議農政因語農官上
林隙地可規治藝五穀若古弄田皇上幾暇監農不
易迂而實切其說既不行且有竊笑之者憶古制之

不復者多矣豈獨是耶感而賦之其詞曰

王政之大無以加於農乎林林總總以食為天茹飲俗
變稼穡興焉唐虞至聖命稷是先蒼姬八百年之王業
實基於生民之篇炎劉去古而未遠貽謀亦慎乎其傳
未央宮中不事流連樹藝有地是為弄田謂昭帝幼沖
未能親於帝籍鉤盾近省姑試耕以為劇何考信之不
覈致流傳之昧實蓋祖宗為敦本而設雖曰遊弄而亦
不忘乎稼穡也天下之治生於敬畏目擊之頃知農夫

之艱難粒米之不易有不惕然而悟凜然而喘者乎其
為弄也非奇技淫巧以數常也非狗馬遊獵以導荒也
非鄭衛哇邪以塞聰也非妖豔靡曼以作矇也非以人
為翫若董賢鄧通也日底天廟土脈膏滋爰驅骸餽俶
載其時擾而人立甚險竿之嗽危播而子落若淵客之
珠璣人牛前逝牽石後隨又如跳丸之飄忽走索之飛
馳俄青倏覆乎畦畛何眩人之能為惡莠亂苗尤務去
惡俄穎俄粟挫挫其獲蓋始于舉耜而終于鉅艾莫不

可翫而可樂顧俳優之褻狎器物之不軌魚龍曼行之
鄙吞刀吐火之詭何足以辱天視之一睨哉若稽耕藉
有國大教王后供種太史播告秉耒一塲朱紘有耀神
倉鍾藏豕宰舉要所以勸農民供齋盛而事天地與祖
廟也三代共由之大典百王不廢之要道何周宣中興
之哲王乃不藉其千畝至形號文公之譙則江東之未
暇又無足與校也開元之盛種麥苑中太子侍登治並
古隆是亦弄田之遺意惜其有始而無終於惟我朝登

三邁五南郊畇畇有田千畝大臣代耕歲事修舉而齋
宮尚稽於享醴玉趾未親於舉武是以奮庸之士拳拳
有望於復古昔周公之相成王也書有無逸詩有七月
知稼穡王業之艱難丕顯文承武之謨烈率婦子而親
觀宜詩人之播說臣願割苑中數畝之隙俾從事於播
種備春秋之遊豫洵未央之名弄然後講三推之儀明
五禮之重臣敢陋潘岳江淹之賦復有周之雅頌也

鬪駝賦

元統甲戌九日上幸後苑觀鬪馳有壬適有奏對獲
遂一觀退而為之賦曰

于嗟乎馳爾軀孔碩爾能實多龍斯天矯山斯蹇我生
鄙善之絕域邈流沙而迅過日三百猶跬步輕千斤之
負馱方炎風之煽毒劇殲人於札瘥爾乃即沙滅口誓
候靡譌度磧渴水口塵莫吐迹踣而鑿涓涓盈科其或
脩程阻艱芻秣罔繼漉麴茹銜糾纏堅閉浹辰無飢萬
里不遑校他用之凡獸茲實氣稟之尤異者也蹠不分

甲踣鐵其堅肉鞍喂嶮雙峯矗聯復有傑出一封歸然
力倍恒品直當萬千其穹莫扳抑之即從弭耳伏地屈
足漏空累乘駢坐奚婢塞童毳繩掣鼻自西自東昂首
噴穢呼圓生風翠釜之珍其忍取供流湏甘頰馬酒釀
釀墮毳紉緝褐被域中風土既習字育日豐板襪其雛
稚紫茸茸冶銅象形僅得其槩疥不嫵媚劉文適類景
純著贊論功遺大厯唐及宋紀述未備皇元御天西北
首賓天竺效貢泉渠空羣魚魚連連列殿雲屯千乘萬

磨蟻割然踴躍人立對起波瀾土墳雷轟電駛持久跼
跼勝負未決貂璫聲援陞楯皆裂餘勇雖鼓虛驕已竭
嗟兩雄之相危卒不遑乎一蹶勝者植立揚揚自慊主
矜調擾望拜蹙躡天為噬噓賜沓繒帛嘗聞單于祭三
龍祠以是為樂龜茲觀七日戲以占耗息今始得以驗
其說鄙哉季邱介金其難杜鄩走馬時在側微開元南
面何取於斯顧羽毛之瑣瑣瀆黼宸之巍巍而登床之
舞馬亦不過示異於宴嬉又孰若大逾犀兕猛虬虎驅

可以鼓吹飛之士激羽林之孤者哉小臣在列顧瞻震
栗悸定而懾氣塞而釋目隘而豁足痿而力歸來人間
塵土全集袋馴白唐籠飼促織黃雀山鷗種種有敵下
里何知小兒方劇觀於海者難為水曾何辱乎目擊然
臣有芻蕘之言增渤海以涓滴大小雖殊翫物則一惟
吾皇游六藝之圃徵勝負於往昔愚臣一第非手搏而
得視試下為期門之徒亦粗可以備顧問而陳得失也

三臺賦

至正三年九月二十四日有壬偕明初馬徵君游三
臺明初有長句既次其韻永歌不足又作是賦其詞
曰

歲癸未秋九月霜清寒薄天宇澄澈塗無長泥庭有積
葉高陽子逸興作呻畢輟趣膏秣事登涉壺清露之芳
醞從白眉之佳客乃渡清洹稅駕乎鄴覽山川之形勝
弔陳迹之未滅客乃指顧而相告曰子亦見夫三臺之
嵒薛者乎氷井峙北金虎踞南銅爵巖巖中立而三若

稽作者振古所慙欲祛我銜不能縷談予亦欲聞其凡
乎高陽子曰嘻昔有塗巷話古事及漢季小兒聞曹敗
則大喜劉蹶則顰蹙而出涕蓋人心天理之所同況怒
其人而履其地因其跡而聲其罪不亦宜哉客乃言曰
吉利之生姓不自知由嵩已冒夏侯何稽舞戟禦捕啖
葛如飴誑叔以疾拒客以泥睥睨一世岸然肆欺雖橋
何之見異卒莫逃子將之譏謂興義以寧國致羣材之
景隨爾乃劫遷乘輿地尊天卑彝倫攸斁大廈以隳及

乎袁尚既敗審配亦摧黃星斯應赤精遂微入鄴領冀
州之牧中天植不臣之基慮幾人之稱王乃居之而不
疑幾簣幾杵成茲崔嵬子午梁貫愈出愈奇三山鼇戴
雙闕鳳飛連薨複道相為蔽虧累棟山積周軒雲齊陽
宮冬熙凌室夏淒審曲面勢有巧無遺衡漳浩浩乎其
北隆慮靡靡乎其西收千里於寸眸萃萬景於一時卷
山河而匪席指風霆其在順應劉王徐唱酬諏咨登高
能賦家有陳思父子放志欲長若斯天道惡盈樂極則

悲撫沖弱之季豹顧婉孌之蛾眉語託人而哽塞惟泣
血之漣而痛富貴之長違遽盡露其情狀彼一床之八
尺容幾許之總帳要脯糈於朝晡競聲樂於朔望分香
衣而造履組舉瑣瑣於屬續其橫槩賦詩之雄發辟弑
后之威奄忽而俱喪匪不及乎篡代不蓋定於主鬻鎖
諸妓於幽閨望西陵之莽蒼念舊寵而興悲抑茹怨而
自愴霜鴈訴秋露花泣春宰木行拱几筵有塵哀絃急
管其聞不聞事往跡存如惡不泯夫以精舍二十年之

規欲媒孽萬年之為君不知司馬家兒已瞠乎其側而恥於附其翼攀其鱗也徒為趙燕魏齊之張本因之增侈重困乎吾民幸疊障之不鏟俾表惡於無垠今吾與子效小兒之顰蹙申欺孤之公議傾壺中之清醇澆胃次之醜磊且以酹漢室征西之將軍魏家創業之武帝子以為何如高陽子聞而歎曰瞞乎瞞乎如客之言則爾之罪窮天地亘萬世而不可貫矣然誅則以心論言不以人廢乃歌其歌曰對酒當歌人生幾何憂思難忘

唯有杜康於是引滿竭壺興盡而返回望三臺渺蒼茫
乎醉眼

瑞麥賦

大名為河北大郡開又屬州之大者也皇上新守令
之法於是哈塔錦裕嚕元臣白守忠公嚴皆以郎官
慎選出守是州未幾政化大行瑞麥駢生或一稔而
二實或一莖而兩歧二君寄圖徵言於有壬乃為之
賦曰

靈芝兮三秀珍木兮連理萑蒲兮叢生嘉蓮兮共蒂是
雖委祥疊貺之可書曾不足以弭枵腹之殷雷效粒米
之狼戾睠茲澶淵茫茫大田觸凍寢生細莖插煙四運
周歷六陽氣全冷霧免殞赫曦實堅方翠浪兮漲陸條
黃雲兮際天乃斟我箱揮鈔電旋京坻善收中有異焉
金芒蝟磔珠寶蟬聯一稊二粒若子之孿一莖兩歧若
首之駢耄倪駭矚奔走喧闐念休徵之允叶盖有開而
必先即影而求其形非根我黃堂之二賢乎二賢設施

知所先後既基化於庠序尤盡力乎畎畝習福感其至
誠坤靈獻其英秀漁陽張堪壽安劉懷之美寥寥乎無
聞乃一旦而我有歸之二賢却不敢受歸之天子天子
萬壽昔聞繅史茲應昌期言之不足故永歌之歌曰天
人夙邈兮理則一機天不自為兮假人而為焉得九州
兮皆若人斯俾我黎民兮永不阻飢

雲莊賦

為開州監郡裕魯元臣作

有趙國公子生輦轂綺靡之鄉游幽并豪俠之場名門

疏大國之封少年為列宿之郎宜其習奢麗以成性乃
漠乎與世而相忘視富貴如土苴渺神遊乎混茫遺情
萬物窮睇八荒獨於雲而有得爰挈之而名莊爾乃登
大行之孤岑立居庸之絕頂謝人境之囂湫覽天宇之
高迴以原隰為場圃以峯巒為門屏因翠壁以作垣挹
清泉而寓井水光山色松聲竹影曉霞晚烟漁梁樵逕
丹青不能盡其美但意會而心領於是行水窮處坐看
起時始氤氲而如蓋俄改變而為衣愛無心而出岫猶

主人之忘機泊與淡相遭空與寂相依即號究實其殆
庶幾乎午橋平泉豈不完美盛衰靡常孰裴孰李今也
自舒自卷不亡不存邈乎無何之為鄉茫乎廣莫之無
鄰方憑藉以自怡又何暇於贈君彼有見孤飛之白而
思親望暮合之碧而懷人雖所遇之或異是皆觸乎目
而融乎神者也若夫撫叱豐險起而從龍不惟呈五色
以表祥瑞因二至而示吉凶蓋將由膚寸而雨天下吾
然後知是莊之有秋乃若是其豐也

至正集卷一

欽定四庫全書

至正集卷二

元 許有壬 撰

古詩

紫芝

紫芝美孝子黃葵也葵之孝格于神故嘉瑞為之應焉

曄曄紫芝生于靈丘蒼蒼格思惟誠茲酬曄曄紫芝不
林不谷匪焯而心孰華而目絢兮嚼兮著則慙兮哀哀
我思終其漠兮惟黃有子我歌不侈罔俾九齡氏振古

以擅史 四章章四句

陳氏念初堂

靜觀宇宙無物無初惟繁斯焚惟遠斯疎哲人有惻乃
顏其居俾求諸一貫此萬殊源而瀰漫根而紛敷始惟
一身忍至道途繼承勿忘服盡愛俱雖千萬年亦今日
如詠祖思陶譜族有蘇猗歟陳門異世同符

及樂堂詩

并序

惟帝降衷孩提知愛孝始百行愚哲攸同性也推至

夫溫清澣澣承顏養志舉盡其道則能盡其性孔訓之三鄒書之五有一於此其陷溺為何如能盡其性又有命焉親幸壽考傷哉其貧累茵列鼎欲養不待若夫及存而祿足甘毳而又康寧期頤子獲盡道是豈偶然者哉舉天下之樂無以尚矣北平劉進文質母王夫人年九十一聰明不衰調益都判官奉板興行有日請曰天既厚吾母以壽康曾玄且二十人又豐吾祿秩俾有以為養吾獲此天地間其為樂也誠

不自禁竊取曾子及親仕三釜而心樂之語以及樂
扁堂子可為我詩之嗟夫為親至於見玄孫為子白
髮而奉母能盡其道而不可必於天者又得之誠可
樂也文質弟繼祖俱以孝弟稱子孫詵詵慶且川至
是皆可樂而可紀者也其詩曰

昏勞企秋伊農之貞力樹侯實惟圃之恒而圃而農有
饑有飢人靡克遂天實致之育蒙期哲撫毳欲堅匪毫
於愚則殤以鮮生願為兒養必致樂或傷不待或困藜

藿昔也拮据于長于教今也怡愉施萬一報有黃者髮
有兒者齒較年匪茲人孰謂爾諸孫白首孫婦已姑挈
曾抱玄永日以娛皇皇天休秩與子偕後大斯審禎祥
日來庭萱媚春綵服輝書請歌我詩益介眉壽

神山避暑晚行田間用淵明平疇交遠風良苗亦
懷新為韻十首

田塍晚獨策及此時雨晴東畦與西疇泱泱流水聲豐
年已足歡清風復多情歸來藉草坐濁酒還自傾不用

澆磈磊我懷無不平

寢迹非絕世雅志便林丘青山足一至勝處靡不遊意
適輒忘返茲焉夏已秋遙遙目力窮青青盡田疇迷復
幸不遠歸歟無異謀

脫身豪俠窟里氓締新交愛其心無甯不較醉語饒生
兒更有教治地盡肥磽禾黍已在眼瓜蔬早登庖愧子
良已多況敢希由巢

浮生苦無悰道近人自遠重外樂絢身遺世幾赫咍老

農初不知遑遑歲華晚清晨負耒出日夕行歌返悠悠
千載心它人莫予忖

落日照我影頽然溪水中涼颺動絺衣勢欲凌虛空顧
之一大笑與爾將無同昔也爾何達茲焉爾何窮莫遣
山林陋乃有黃虞風

昔人植松柏暎蔚彌崇岡不為朝夕利千載當自長植
槿非不榮我圃因之荒白髮走畏途途脩馬非良桑榆
賴非晚此樂且無央

靜念少日事躁中劇捭苗欲令千載淳反之在一朝斥
鷃不自量上欲搏扶搖世態任盲俗林譏愧清謠傲骨
日已長及辰事逍遙

淵明昔歸休閱歲才五十我年雖近似我道慙什百兼
金與尺璧敢取儕瓦礫緬焉動真想迅往孰誘亦庶幾
歸田園千年可同迹

我聞昔桃源民風近無懷茲山亦深窈中有讀書齋但
絕車馬迹不惜雲烟埋旁圍靡靡山上蔭高高槐聊以

永今朝得酒從無媿

我髮日以變山色日以新舉杯試問山古今閱幾人我
非山主人聊為山之賓杖可入幽險詩能寫清淳但恐
我它適山乎爾誰鄰

和林春野見寄韻二首

山中真可樂經旬無客來羣材足梗楠小臣甘草萊君
看倦飛鳥投林不徐徊咄爾迷途人悵悵自紆回海鷗
久已狎鸕鷀復何猜秋風看木落春風看花開既種子

猷竹亦有逋仙梅先生可休矣大夫亦賢哉高步雲漢
濶蹢躅詎能陪尚可學采藥談笑到天台

士生如大木皆欲架明堂寧知施用處用圓吾乃方歸
來何所事琢句敷腎腸既為烟霞痼復作花月荒一壑
今已專萬景身可當山空白石爛雲盡青天長故人遠
相慰瑰辭聯夜光一展發曄曄再誦鏗琅琅貞松無冶
容老桂多古香三復如見君歲晚誰能忘

送陳日新下第作吏

擢科出倅郡并闡妄司衡多士于來含芳吐華英陳
子隼解條氣薄秋空清衆目待一飛衆耳待一鳴如何
夜堂深乃著蹟且盲冬烘我莫逃得失子所輕一瞬二
十年鬢髮秋已驚顧我得逾分念子猶無成琴瑟况解
張奎壁韜光精昔慙有遺才今慙負登明筐篚古雖鄙
萬一志可行但期敦素志道義非功名

徐公渡泛舟

隆暑近莫逃泛舟涉兩舍昨辭城市喧豁若脫暑獲晨

光動清波蕩影天上下縱橫亂葭葦縈紆入川滢鮮颺
不待延青山自來迓林君望咫尺雲間屋如畫世味久
嚼蠟佳境今食蔗塾人傳好語時語了禾稼村酒賤可
期雞豚亦在社伊誰從老夫一筇兩不借

題神山徐復初拄笏軒

小軒闢靚深有竹蒼玉立西山在吾目爽氣朝可挹此
笏本長物聊用為手飾書思非吾事時還假揮斤江左
昔偷安祿已去公室司馬慕玄圭坦之遂倒執滄海正

橫流皇皇欲何適敢期相料理我自甘野逸勿言晉多狂允矣狂也直悠悠千載心為爾長太息

贈吳吾山

世欲問窮達吾山能洞知老我不問命但問山屬誰青山處處有子豈能擅之吾不曰吾山山英將有辭

謝熊堯章餽大茯苓

故人念多病投我以茯苓如拳已足貴紀狀聞圖經眼明見異質斗大陋楚萍內儲貞玉白外皺乾蘚青喬松

薄霄漢何年摧震霆餘撥槎枿在附根精液渟孕毓幾
千載成此龜鼈形想當捎菟絲木魅驅玲竈玄壤發神
秘蒼雲披杳冥予年過半百鬢髮宜星星有懷事服食
緣木思津網筋力疲已甚始遂辭天庭一朝獲仙藥脩
餌期致靈凝酥爛冰雪作餅謝臙腥半生足驚悸坐使
神志寧三山得津梁百穀消蝗螟倒影反暘谷逝水回
滄溟羽翰生白日豈特綿脩齡報子無瓊琚永好心當
銘

秋蟬

秋蟬何咽咽竟日鳴不輟始隨雞唱曉遂及蛩吟月當時出汗穢風露養高潔於世既無求底事苦喋喋豈亦感歲時青林見黃葉我來逃空谷塵囂謝騷屑苦遭此物貼坐使幽致歆清霜行秋杪未許滕口說

同劉先遠盧正卿遊青山對雨

槁壤得時雨瞬息生意足白日變玄冥青林出膏沐坐觀漲橫塘驚傳響脩竹開窓望陵坡麥穗一時矗涼颭

靜自生旦氣清不枯佳人可晤語鄰酒今朝熟

和前韻

世路分多岐人生貴知足五年紫微垣今方快休沐
茫宇宙間何地無松竹身隨心所樂興與雲俱矗
讀書舌尚在揮毫手誰枯萬事勿多談老子計已熟

得請南歸道過維揚王本齋轉運尚書大書七言
二句見贈擬非其倫深用悚愧即其字為韻走筆
賦十四首以答之

驅車出都門，搖搖適故里。山川雖如昔，父老半為鬼。釋
負誠足歡，愴舊曷能已。浮家一葉舟，又渡淮之水。

五年玷班行，幾似誰不去。籠禽束遠翮，櫪馬窘濶步。解
條且脫羈，一旦遂騰翥。茫茫宇宙間，何往非所寓。

昔賢及壯年，勲業青冥上。白髮今滿頭，愁共三千丈。惟
餘詩酒興，欣遇時一放。江湖好風物，平地足波浪。

醢雞既出甕，始知別有天。學道愧遲暮，簪纓妄拘攣。采
山茹得美，釣水食有鮮。厚養成醜繆，一食徒萬錢。

高風勵百世一篇歸去辭晉豈無文章歐公亦非私但
懷賢達人今古誰似之雲泥固懸絕涉海從其涓

抱關守常職辭富初非讓跛履忽踰涯脩途誰爾杖不
為糟丘仙當作詩壇將悠哉復悠哉我自敦素尚

兔園自可樂龍門非所望徒承素餐羞本乏食肉相山
林儘高深消得屐幾兩悟此真不憂清吟繼漁唱

百歲已過半一途惟有歸蘆花烟水國恰值鱸魚肥此
去狎海鷗與我應忘機敢言誇畫錦政爾羨荷衣

巨舟阻弱水不能到蓬萊乘槎亦贏糧畢竟胡為來坎
井蛙跳梁地適符其才漢江風雪裏行及賞寒梅

達觀天愈大安步地自平回頭三十年狗苟復蠅營始
知方外境風清月常明幾欲扣船歌又恐魚龍驚

淮南古名鎮歷歷舊遊地政雖無留觀來尚多故吏二
師瑚璉姿東南司大計笑逐舊將軍滿船沾鬻載

身心何疎散經日廢綴作邂逅老詩仙技癢不可遏會
少意自長楮盡氣未索奉上謹正堂詩仙定予喙

陳力已無效，摘毫猶有神。明月樓中酒，開明橋上春。自知疎慵迹，不是薄倖人。休教街子見，枉笑白頭新。

心遠程不迫，身閒人即仙。弭楫竹西渡，坐見平山烟。珠簾十里卷，長街市井連。可憐瓊樹月，還照渡江船。

阻風

沂流亦勞止，况復逆長風。百趾挽脩綆，磬折嗟無功。南來汭流者，挂席高摩空。長年嘯歌坐，飄飄逐輕鴻。矜彼方志得，笑我為途窮。寄謝順流人，順境鮮克終。月食常

在盈日昃因其中八方鼓噫氣誰能必天公五兩行轉
指將爾予今同但宜安所遇誰窮復誰通

黃華山次王鹿菴韻

吾聞林慮西茲惟羣山會一舍入高寒百里見空翠雄
踞韓魏境特立宇宙內雪波驚起陸天華亂紫蒂排雲
列奇峯極目認涯際出泉如江河巖壑因橫潰轉曲路
疑盡喧逐地將沸千崖與秋高一逕穿雲細仙凡幾塵
隔跬步萬景萃攀援攻折屐馳騁謝攬轡水簾最雄偉

清響落天外淵客泣淋漓天孫織織麗空明幾百尺振
古倦不易清冰瑤草亂白日洞天閱自非骨有仙未許
踐福地盤石几席陳魯酒穀藪配道士山中宜宰相山
中貴泉石聽吾言吾言諒非戲

洪峪用鹿菴韻

穿雲驕馬瘡俯檻飛鳥還層峯爭獻奇一一青雲邊懸
泉走白虹遙岑生紫烟肺腑巧遮掩罔巒隨折旋我有
扶老筇不讓歸湖船三日得其凡一念窮其巔便將巢

雲松終歲看玉蓮誰能共幽討未用譏流連

九日登鳳寧山

亭亭鳳寧山形勢若飛動胡為不飛去仙真此搏空靈
迹既不悶煙霞遂增重城居見其圖清賞時入夢今朝
事幽尋霜風肅飛鞚適與佳節會更與佳人共危亭構
兩翼飛雲連畫棟翠柏瀉秋聲紅樹列清供遐觀千里
近長歌百杯送洄流漱其根俯瞰清可弄陟降自忘疲
酬酢亦豪縱牛山何用悲茲方待鳴鳳

謝鼎珠文參議餽鮑

我生本寒素放浪居江湖得魚食便足一飽它何需胡
為走塵土甘受口腹毆餒餘分太官冷暖從膳夫弱胃
傳化難野性嗜好殊况此肉為糧南烹轉紆迂鮮鮑得
何所煦沫憐相濡癭盤勞走送犒此山澤臞香稻炊白
雪渠梳登腹腴老饕笑捫腹翻疑身至吳但愧負將軍
未能出嘉謨何以消永日融冰煮臯盧半山固可議羹
飯真良圖人間校至味更有松江鱸

至正集卷二

欽定四庫全書

至正集卷三

元許有壬撰

古詩

代祀壽寧宮二首

昊穹倣脩德迪畏嚴宸衷薌幣亟將敬於焉達帝聰鍊
師功有素精誠假潛通通明闢晃蕩霞光破冥濛義娥
叱順軌敢爾好雨風感民詛作頌轉歲凶為豐天子謙

不有冥冥歸太空

上京據高寒三伏凜毛骨况在虛皇壇當空掛明月沈
沈清虛府練練水晶闌一玄但自守六合遂生白露冷
簫聲脆風急旂影掣祝釐肅將命承乏愧調燮醺罷不
成眠歌詩山石裂

拜醺疲甚有感

代祀踐真境愜心遠翳塵神仙足官府乃與人間均陟
降堂復陞拜伏昏達晨熏焚竟三日疲痛叢一身嘗聞

古有訓至誠能感神我身苟先億我誠何由伸玄門守
恒式損益誰為陳君恩大如天欲報嗟無因微勞敢有
辭丕應庶可臻封香侑玄纁肅肅來紫宸堅心自格天
真機寧假人叶氣回洪鈞時雍變黎民萬物遂生生萬
拜甘踐踐

午睡

退食半日閒嬾與困相值強取床頭書披觀欲臥睡豈
知睡有魔方冊乃所萃一卷閱未終瞠目遽有閉支頤

始排遣脫腕旋擲置鼓勇時起行稍縱卽如醉抗敵慙
不武隱几聊曲臂儵焉溺愈深就枕遂成寐南柯在何
許一造乃徑至憂樂忽兩忘得失混一致幾年事朝謁
雞聲坐憔悴白髮身漸衰彤闈事多愧誰能義皇上祇
益宰予罪安肆日以偷居然氣勝志希夷心有託文過
敢援例朽木糞土塙斯語今請事

和虞伯生學士壁間韻

在公抱隱憂出塞得奇觀青山萬馬奔龍門忽中斷地

平豁四維天濶張一幔寄語鳴笳兒休驚暮鴻散

病起漫述

南烹習若性出塞勉隨俗老饕不慎口藏神畏多肉流
歎引羶杯馬湮注盈腹河魚巧伺人乘間得肆酷瞑作
遂達曙腸雷殷空谷三日不能朝一餐惟可粥中年體
易虛攬鏡笑盲目今朝氣漸蘇鼓勇出衾褥翰墨試短
吟經史時卧讀朋來酒入務清話慰幽獨嗟予未聞道
結髮事干祿素餐古有譏伴食今不惡士貴早知止聖

許不遠復歸哉復歸哉瓦孟安脫粟

養馬戶次同年馬伯庸中丞韻

時盡奪驛地
馬戶益窘

盛冬裘無完豐歲食不足為民籍占驛馬骨猶我骨束
芻與斗菽皆自血汗出才釋鷹師鞍又服梵子轂邊聲
或玄象去馬便可哭朝廷播政令黎庶供力役生兒甘
作奴養馬願飼粟源源急星火金符出黃屋譬舟苟使
覆載物其能淑百年具成規受他貧敢鬻粟麥被陽阪
黍稌滿寒谷圃蔬接畛青樹果屯雲黑一朝化榛莽坐

使歌成泣我身非土梗我馬非鐵石餬口有四方從渠
安傳食

宿臨湘贈監縣亦誠之

北風櫓聲乾晚泊斷磯下雲岫浮脩蛾霜空入平野鳴
鴈無處尋落日不可畫重岡護巖邑百里寄民社籍甚
賢大夫居然魯恭化豐年足粳稻沃壤滿桑柘我如無
心雲底事勞候迂爛醉得詩歸江山非傳舍

題喬江書院

朱張挹洙泗一滴沾濱湘源遠流不沱導之日以長黃
子鼓勇出大川獨力航忍貧如鐵石悅道逾膏粱乃眷
作人地舉仆萊其荒萬簣陞偃陂數仞瞻宮牆銖積至
山岳拮据十五霜為善名莫逃飛剡達廟堂署額等四
院職教尊一鄉矜佩來濟濟絃誦聞洋洋遂令錐刀子
薰德皆善良食焉怠其事視此背負芒便當伐樂石紀
功大書黃且以勗後承且以風四方

湖南憲照磨王魯琦孝行用同年歐陽原功學士

韻

悠悠孤飛雲混混東逝水倏焉漠無迹何以親棄子出
門事鉛槧附耳承音旨時雖有行役猶得賦陟岵三釜
何嗟及九原竟不起滄海拓土遲春暉寸筵霍表桓樹
風聲天下資孝理平生幾多淚盡用洒蒿里發硃試妙
割解衣睨衆史清芬播魯甸脩程肇南紀執法樹有烏
宗廟彝有蜚揚顯更勗哉孝子事終矣

題龍處厚所藏子昂畫馬并書杜工部詩

書具畫原抵畫寓書象形詩於二者間神功毒而亭工
詩豈暇畫能畫書或拙獨有鄭伏虔當時號三絕湖州
松雪翁清風玉堂仙三事各臻妙前身是伏虔世知公
書畫不知詩更雅時還寫杜詩千金莫酬價

天歷初布尼雅實哩子謙以翰林學士承詔禱雨
關中有應虞伯生學士作詩序子謙監湖南憲求
詩

皇威鋤閼梗宇宙如再春關中號土膏其膏乃遽屯化

為彌天魃毒燄煽西秦父且食其子天時彌吾民弱斃
積京觀強奔劇驚麋九重動惻惻羣望驅跋踈膚使著
脩潔御命出紫宸家人不暇辭一鞭清渭濱肅肅將淵
衷憲憲孚嶽神靈湫素有物雲霧生逡巡甘澍被隴陝
宿種爭青新窮鄉轉樂土蔽野開天囷歸來拜天子小
臣事已竣乃知是為霖眷注邁等倫四道使持節冰霜
照清真何當推厚澤汪濊周九垓

題周元玉小像

之子身輦轂思翁在山林畫圖記真趣茅屋老樹陰北
山可娛目曲江可洗心攜從無長物萬事一張琴勿輕
三尺桐中有太古音俗耳不解聽野猿時共吟甫云避
俗駕穿雲深復深我欲問天籟翁其何處尋

贈吳青陽

氣在天地間正則能勝邪古人傳祝由末路攻蹈瑕亦
惟有道者擷實刊其花札瘥乃莫干袂厲況敢加融為
一脈春生生此萌芽是曰青陽子錫汝名維嘉曾桑流

暖雲東天亂晴霞神仙謝禮穰蓬萊子其家

游岳麓書院登風雱亭尋朱張遺蹟用疎齋盧先

生韻

聖去書歸然道近人遠而蕪穢亦已闕俵俵昌從之大
原出自天挹彼可注茲茲山昔受度會遇休明時朱張
操大舟涉海示我涓孰云事游宴罔嚳肅威儀行行惜
芳草我馬不敢馳百泉流玄酒萬古供尊彝嗒然發深
省豈不豐我遺點爾見大意風雱本無為嗟哉二三子

長育駢其椅其椅君勿輕庸立丕丕基

泊樊田浦與楊廷鎮董仲達馬明初黎仲顥以澄
江淨如練為韻賦詩分得如字

幽討愜觀物遐心陋懷居衡湘佳遨遊乃是三月初
泝既有舟登陟亦有車東風動橐籥生意彌堪輿望望
滿花柳欣欣到樵漁嚶嚶鳴好鳥洋洋躍潛魚感觸悟
妙趣江山豈遽廬佳人一樽酒登鮭紛腊脍詩荒甚從
獸萬里為周法懷哉淵明語不樂復何如

三月三日偕廷鎮何復初仲達明初仲顥諸君淨
居巖流觴以崇山峻嶺茂林脩竹為韻賦詩分得
脩字

過雨發清朗惠風扇和柔薄言衡山來禊事茲焉脩淨
居古洞天林壑阻且幽翼然有危構篆石分清流懸鞍
出柳觴汎汎如楊舟注視幸瞥逝驚呼或夷猶我生本
無心何事非天謀佳節適我遇勝地復我留雜遝來羣
賢顧瞻隘九州予以雪滯慮予以資冥搜但恐俯仰間

陳迹不可求誰能更校此且復隨觥籌

題王季卿蘭石用伯生韻

猗猗九畹蘭鑿鑿一卷石石也無俗狀蘭今有佳色停
雲渺予望相思隔南國春風汎崇光秋雨漬寒碧三生
老毛穎談笑出香澤此兄儼在旁拜爾吾不惜尚友誰
同異守玄類堅白山林深復深誰哉發潛德

題廖氏青山流水之間亭

泠泠澗下水巖巖天際山得一已足娛況在二者間動

靜悟至妙樵漁濟幽閒莫謂獨樂園青雲杳難攀

衡山回廷鎮送予至湘潭而歸綠紅專俾寄詩廿

韻和以謝之

老夢熟湘楚時時到南山一朝乞身歸飛墮紫翠間危
構矗鐵壁懸瀑分銀灣朝才發琳宇夜復栖禪關直造
祝融頂歌呼破天慳靡靡薄月窟纍纍俯烟鬟窮幽不
憚險重趼寧辭艱上及天八重下視海九環羣峯各爭
奇信美無與班酒酣一縱目山鬼無容姦乃知天地間

陋哉此人寰佳人山中仙七十猶童顏投杖拾雲磴躡
屨披霜管毒龍呪可降哀猿泪不潛勝游冠平生及此
俱投門百卉開淑景萬壑鳴清溪當年看圖畫何殊管
窺斑云胡山下來便駕扁舟還悠悠湘潭雲回首去莫
攀玆重二百言人間豈容刪

贈談命廖如川

儉人不知天富貴矜自有顏含真達者性命立分割顏
訝昌黎公百代仰山斗云何銘虛中宛轉為滕口乃知

窮壤間至理不容鄙之子得所傳摘異出淵藪觀物隱
市廛萬事一揮手我方杜門坐懔懔日思咎君來諭以
理端緒解紛糅誇嚴敢厚誣居易甘墨守酌君雖無貶
澹泊自相受他年黃鵠山談玄期白首

觀高竹樓太祝栽松竹

栽松長及脰移竹萌附鞭竹生可坐待松長知幾年人
生誰滿百枯榮遞推遷云何守毫末欲見高參天大史
十年計愚公曾復玄充罷非梓漆佳城護封烟封殖遠

樵牧邱山為增妍他日君倦游拂袖歸林泉風聲聽蕭
瑟午陰坐清圓可憐桓司馬撫樹應華顛

游高武肅公祠其孫箴竹樓請賦

青山去我屋相望三十里平生丘壑想圖障見亦喜深
居忽涉歲命駕行復柅一朝跨款段徑造莫吾倚維時
春始和風日助清美况有武肅祠松篁清邈迤後連不
盡岡前渟有源水當年宋火熄天兵混文軌廣武號知
兵終見墟趙壘從知大厦傾一木本徒爾投戈活遺黎

綸綍豐碑記諸郎各膚敏腰犀間金紫桂叢連夜臺蘭
孫萃繁祉太室侍祠歸追封及先妣喬木固多陰高門
真有子憶昔弱冠初泓穎實同几爾來三十年此會誰
敢擬登覽何足云世美見橋梓願言播清塵家乘掇已
燬當筆無我名為君脩野史

和丁文苑同年同游漢陽韻

武昌黃鶴樓勢欲吞沔州沔亦有秋興萬景遙相繆我
思較二勝幽齋坐窮秋相攜得勇往兩袖風蕭颼空明

盡纖芥中流放扁舟行窩更不凡南湖頻夜投張弛各有適齷齪徒增憂諸公酷愛客我醉聊乘流方外有青山人間多白頭東華塵土夢今日喚醒不

題熊堯章擊壤同聲集

放勲昔御極蕩蕩民無名如何擊壤老乃有歌謠聲聖德大如天春生秋自成耕田與鑿井爾力吾何營康衢順帝則知識嗟已呈後來寂無聞所聞多不平聖朝復隆治萬彙遂厥生有人圓大和不屑軒冕榮自同擊壤

老歌詠流鏗鉤玄酒陋糟粕至樂希韶齔古詩本情性
世降體屢更能知發所樂天機自縱橫世有采詩官君
詩其大行

和彭道原苦熱

大暑真酷吏煩虐非所當乾坤舉為爐江河沸如湯區
區晚學道自信冰雪腸一朝走畏途故山空草堂乃於
尋丈地守株待微涼扇揮腕欲脫汗浹背負芒毛穎枯
不神雲烟失淋浪紺天頑無風歎氛恣飛揚田野勢欲

盡妖魃猶專場當年崑崙丘截薛冰天長倦飛一截羽
夢寐時在傍回首望玉清宮堯白雲鄉靜躁固不同寒
暄亦何常蓬萊水清淺欲往愁褰裳秋風明日至却恐
露為霜

題澹然監司畫二首

人間望明月似有山河影自非毫素真觀天機作井一
峯倚空閒下浸溪雲冷良工乃爾豪尺許容萬景惟是
澹然翁相看發深省

真龍不受羈飛縻看騰蹕千里自在心秋風寒垣道蒙
莊得其天伯樂非取貌鹽車際遇難駑驥遂俱老所以
澹然翁驪黃都不校

神龍卧沙圖

去年旱太甚深蟄如不知江淮今盡水行雨無乃疲悄
悄欲一問昧昧何從追明窓忽展卷晴沙照鱗鬣烟雲
洲渚深五色驚陸離淵潛亦有地天飛豈無期胡為此
局促獷獺爭相噬清波咫尺間投足誰轉之自計彼方

金匱要略卷三
爾責望人其癡會有變化日良工不吾欺

獨石和姚子中參政壁間韻

北征日見山羈懷殊不惡涼颼生兩腋鳴泉清八鑿一卷突虛空大地貫脈絡維時霖雨行平壑注為壑特立看奔衝千秋壯沙漠彭蠡有大孤天星幾時落遙遙阻幽遐屹屹氣相若翠華歲清暑校勝誰敢謔效米欲拜兄時人定余喙

題黃珏玉成字說後

五瑞慎頒爵六器嚴禮天彼美乃有雙藏輝未渠宣恥
為璞獻楚寧隨石名燕一朝遇雕琢百世無棄捐純淪
固自若隨用非拘偏取言敢溢美奇實當共全勿云鮮
不垢亦有垢爾鮮勿云堅不感亦有感爾堅洞洞劇奉
盈兢兢戒臨淵惟是器已成操持尤勉旃

李伯徵中丞奉東宮命作椎結請紀其故以百字
頌而祝之

總角習義方結髮事明主櫛縫易且貂勤勞幾寒暑青

皇一顧中遂與國人伍區別垂鬢雲岐分戢鴉羽昔我
秋谷云爬搔淨寰宇象賢實無愧冠服儼前矩願言壽
而康三握勿為苦它年麟閣上雪鬢照簪組何用拭肝
石道貴隨所處老我任飛蓬詩美繩武

至正集卷三

欽定四庫全書

至正集卷四

元 許有壬 撰

古詩

送孔氏五十二代孫吉夫教授

玄聖立人極功視天初終銀潢流華裔汨汨來無窮汗
青今亘昔碩德代不空布韋奮私淑猶足新顓蒙一脈
况真傳豈與時汗隆清朝急象賢殊科日尊崇君來典

學政千里開盲聾聾比幾何暖歸騎仍怱怱倚門夜入
夢關山隔飛鴻升斗安足留勇退由吾衷綵衣拜堂下
一笑春融人間外鑠物鼠腐特無同祖訓始要道百
行源其中勉旃事聿修浩蕩揚休風

送李謙甫僉事赴內臺御史

乘軺正吏虐終歲無暫閒歸興秋方濃天書忽徵還生
平心鐵石每進常自艱辛苦三十年所露纔一斑遼海
控瀛貉郡邑紛愚姦伯厚號疾惡霜風掃枯管驄馬去

何速飛鴻杳難攀聖朝達四聰虎豹閉九關封章明日
上風采凝朝班勲名屬耆舊澄清徧區寰塞垣歲華晚
相思隔雲山惟應第一義傳布到人間

臺榭趙仲文家譜

維人位兩間發源自鴻蒙別生見載籍述譜聯始終兵
戈既蕩析繼續仍愚冲遂令一身後坐與途人同軒后
植本深枝葉日以豐仲衍開分土公輔懷西戎遙遙幾
千年奄奄及吾躬遠者湮莫究來者方無窮在昔苟有

作時乃詒謀功由今勗後裔親盡情皆通歐公痛禮廢
峻語驚矇聾云何世論隘反欲操戈攻于嗟趙有子孝
誠出天衷寄言嗣述者百世延清風

曉出順安站望九華山

遙峯隱初日佳氣旁四馳明發甫云倦乃及觀山時輕
紫冒深翠濃淡紛相宜出奇迎馬首澗谷來逶迤橫雲
半平林千里俄紛披舉頭萬象明晴光發巖姿青松沐
膏澤錦樹光陸離遠烟濕不散多露行方滋茲游諒有

樂攬轡逢呂期敢求慰詩癖政爾憂民瘼

夜至橫石驛以火照壁見李元鎮詩次其韻

行役日皇皇獨飲不成樂斜日艤斷磯橫江見孤鶴我
舟月亦無風浪從噴薄人生自不歸青山豈難約

監試上都次楊廷鎮韻

客京已云遠出塞仍北去行路已云難隆寒况凝沍我
居豈不懷簡書苦相怖荒荒雪曉衝杳杳河夜渡風褰
裾成帷冰結髯垂素衣單僕告痛坡峻馬自佳人生難

滿百太半委道路徒令傳舍吏旦夕煩視具疏理不耐
寒辛苦欲誰語嘉鮮惟及時幸未薄遲暮清朝右文治
遺賢深所懼當年收梗枏櫟還備數弱步勉馳驅遐
躅敢追慕淵明止一邑曼倩多掌故涓埃既無報卜築
定何處但期得真才特用拯黎庶風俗回雍熙帑庾日
豐裕區區野人心獻芹復充賦

試院感舊呈廷鎮脩撰柳道傳博士二考官

弱歲事佔畢躋道慚未飫世故不我紓飢寒迫馳驚投

身篋篋流弭耳怙衆遇仁皇詔求賢碩礦煩冶鑄墨潘
宥已多朱服仍郡署恩隆報曷稱才短進徒遽佐部冗
莫治司言益無措適當化瑟更賓興切宸慮龍沙鄒魯
均橐籥一機寓塗抹念昔狂盛典欣再與驅馬出都門
凌寒劇膚慙顛風入虛牝萬竅恣號怒重裘力不勝毛
髮尚淒豎賢勞分已甘得友况同趣彼美關西孫洒翰
紛玉露文采照士林問學森武庫而我河東公星鳳夙
騰譽胄館尊軌範鴻音發韶蒞靈臺寶鑑懸五色詎迷

金史卷一百一十五
卷四
誤蹇予獨何幸決日聯高步夜闌聆炙穀疊疊有根據
騏驥受蒼蠅薰葭倚瓊樹得竣須遄歸天墀待鵷鷺話
柄留它年山林陪杖屨

任城馬氏瑩三百年矣諸公有詩請同賦

漢陵鞠為墟唐家餘茂草摸金既著稱飯含劇電掃伏
火熄無光藏兵謾機巧而況齊民流盜發宜紛撓幸存
復委去一再已莫攷任城有望族訶禁竟何道厯歲三
百餘松楸亦安好隆替運有移諷誦日淵浩倚歟曹翰

林椽筆為檄藻勉哉求令猷來世庶永保

次伯庸同年遷居韻

卒歲利深隄盛夏宜高明相攸既兩悖塵闌仍前橫况
復游道廣雜遝來冠纓有庭馬難旋有齋筆難耕衣黔
夜燎蚊腕脫晝揮蠅五畝數仞堂一朝羣美并堂後滿
姬妾堂前羅聖經俸優食可肉是樂甘曲肱故園昔手
植脩可換纖莖筋力人幾何盡用輸官程東山豈不懷
顛崖奈蒼生從知金與紫何足為君榮天下多寒士萬

金史卷四
間施須平可憐三十載韓子屋始成

送王儀伯叅政赴遼陽省用王繼學叅議韻

明良啟昌運英髦來百朋有美蚤馳譽不待文王興士
林炯清致月露秋澄澄仁皇識偉器瀛洲快先登積厚
出宜溥淵渟遂波騰霜空碧萬里見此脫臂鷹位崇節
愈勵食蘖渴飲冰中朝著敬歷東維待規箴含生澤未
洽大任須賢能途平矧車良天高可階升我昔來京師
夜雨惟寒燈相知辱最先讌談時或承既叨升斗祿祗

覺予負丞清時猶海嶽涓埃詎能增躁進敢自省豐壯
本難勝虛名百年苦燠室常凌兢何當有羽翼高附南
飛鵬

題萬安劉桂平義塾

作事驗行已當宜是謂義及物號若殊歸善實一致如
何世有人食焉怠其事萬安卯金子獨善深所愧儒風
旣非昔挺挺以身係念茲士藏脩何異工居肆構築得
爽塏爰作長育地茲山富清淑千古蘊道氣渠渠出輪

負霜霑集杙佩登篋來不拒庖廩日有繼何民非堯舜
何水非洙泗它年見達財慎勿忘所自

題阿巴齊英甫山水圖

嶄嶄翠摩空繹繹寒漱玉三生痼烟霞心賞非耳目浮
雲不澤物乃此蔽空谷蒼髯五大夫似悔受秦辱應甘
老巖壑世態任翻覆小橋俯清流有路儂所熟行當具
扁舟沈竿測春綠

雨中呈察院諸公

雅志足衡茅軒纓非所安七年江湖上心與天水寬仲
胆倏受羈又復逾桑乾遐舉負清時就列慚素餐用茲
愁如飢并介良俱難鳳凰復我池獬豸仍我冠六龍狩
灤水屬車接鳴鑾已甘旼筆誚答効誠昌殫退食坐環
堵羈懷常鮮歡長風送雨來六月毛骨寒馬嘶苾苾薄
僮怨衣裳單撼撼窓紙語瀟瀟簷溜殘佳人隔咫尺積
潦生微瀾晤語遲不來浩歌成永歎獨坐念往躅挑燈
清夜闌何當放疎慵洎水求釣竿

子昂馬圖

良馬可喻賢百駑不一驥銅式未易索紙上時目至涓
人骨千金生者遂坐致世情好厚誣無馬談何易鰲黃
別皦皦求色不求意垂耳分鹽車幾與孫陽值趙公法
曹韓拈筆出遊戲家法無不知喟然心有寄

劉諱史所藏山水圖

觀山有若無觀水無若有天機有無間著此三昧手衆
史疇意領輪扁子莫授秋清纖滓盡勢遠凝睇久絕壑

工竊深驚雲亂奔走浮天見洲渚擘石出林藪清游夙
所貪塵濁動相蹂江湖迹已周歲月坐白首端居念悠
邈頓解營欲紐歸來復歸來山中有春酒

樺陽谷

以下十首次杜敬甫左丞山居韻

世途劇羊腸坦夷隱詰曲幽人甘遠引茹草倚脩竹况
公屬功成皇恩久深沐是宜拂袖歸高與千峯矗大才
生不偶蛇蠃鍾嶽瀆勤勞五十年芳蹤竟誰續天游寄
遐心超萬立於獨有形皆土苴何物為利祿所以丘壑

中脩然脫榮辱清泉漱鳴琴絕辟立寒玉不須在箕穎
悟悅意自足行藏全兩途明哲保多福遂令樛谷名聲
賸聞亦熟林下拜老龐何年遂吾欲

養浩堂

萬物備於我悟此方為儒自反戒不縮舜跖皆吾徒聖
人本無言得已寧有書後來口耳學鑽研成蠹魚豈知
非外至天地吾本初正路舍不由安宅曠弗居握苗謂
得計蕪穢彌新畬先生積有素舒卷隨所如相業昔告

成長嘯辭公車平生動合義天下知明謨世已蒙厚澤
山林實良圖持養猶不替扁堂示區區堪與自今古是
氣無盈虛

招隱亭

激波象綠野峻嶺如山陰松檜昔手植茲焉鬱成林蕭
蕭庭戶間繹繹山水音以茲函丈地寄我萬里心北海
尊不空日有朋盍簪子期已云逝甘對無絃琴淮南異
趨向桂樹空清吟而我已了然但惜居未深誰能皓皓

白坐受緇塵侵寄言膠榮輩斯樂直萬金歸哉勿遲暮
蕙帳秋沈沈

向日齋

廊廟迹已遠葵誠殊未慵屬茲歲律晚晴旭升曛曠靜
翕絕兆朕天濶顏無風誰鞭火馭出忽以春易冬昔年
事朝謁萬馬象魏東晨光射觚稜炫爛迷青紅九重一
洞達六合皆冲融歸來斂手坐安此丈室中丹衷老益
著翫惓嗟凡庸負暄豈非獻調元有豐功想當俯前軒

悠悠思無窮還將金鑾事說與田家翁

貯月溪

小溪瀦清深萬景入涵泳幽人心無營一笑知水性善
淵耿不波相對兩俱靜誰於泓澄中復置透光鏡初疑
磨爛銀又訝琢琇瑩廣寒在水府高下巧輝映鵲臺多
美人弄影鬪端正馮夷形莫逃吳質力已病相望咫尺
間仙凡遂遼賈子知水月乎為子試究竟魄死明斯生
川逝來者應觀變吾不知至理本素定長風吹野服恍

金定曰
卷四
若醉夢醒欲辯苦難名忘言遣幽興

靜芳池

綠池大幾許水氣清書堂中有荷萬柄高低互軒昂妍
媿較顏色千載嗟六郎皦然君子德淨洗時俗粧况復
汗不染傳清遠逾芳瀕溪說天口愛惡非尋常世間凡
草木紛錯誰短長化工果何心不惜萬斛香桂棹碎聚
萍菱歌促飛觴醉來咽花露錦繡新肝腸主人少陵後
麗句分天章倡酬悉名勝吟幟來央央明年還此花未

用愁秋霜

比德泉

巧中遠媒藥脩途謝推轂放情丘園中花草紛紅綠石
泓出清泉天教潤喬木散流遠逾大百卉沾膏馥有孚
君子德取象豈惟玉月明咽清響宛若秋擊筑江海動
能至須眉靜堪矚湛然猶我心纖埃莫能觸有時嗽甘
寒大笑謝領餽清濁付自然奚較纓與足彼有名以貪
千載示泉辱而我方自脩貪廉豈泉卜逝者如斯夫吾

金匱要略卷之三
卷四
儕更宜助

代竹園

此君不可無此語聞王郎千載與侯等貨利吾久忘但
思貞勁節蕭蕭拂雲長風土奈異宜塵俗生門牆遂令
偽攝真名以人遂章未觀花吐白先喜穉隕黃坐令尺
五天化作王家堂薰風舞蒼翠陰敷酒樽涼世無鄙弱
質河廣猶能杭幽風備蠶事曲薄材最良即用較名實
初何愧叢篁平安不必報秋霜愈堅強

鬪榭軒

雙木老成魅偃蹇蟠蛟蚪鄧林不肯往奔騰此來遊意
若爭長雄相瞠何時休怒劇雷破山勢驅海橫流又如
新野戰犀象犇平疇剛風助驍勇白日山英愁前却久
未分挺立誰拘囚念茲本散材匠石棄弗收老仙一題
品勅敵真無儔八公使有此萬木應抽頭幽軒得奇觀
作氣常颼颼霜飛巨葉隕棄甲罄窮秋救鬪不搏搢忘
懷為遲留貌此偶成詩誰令傳九州

肆射平

揖讓世云遠鳴鏑紛沙場百發信奇中
教射誰在傍矢鋒羨相觸墜地塵不揚
周陞亦失旨鴻鵠難高翔大禮肇三代
名存猶餽羊侯明罔聞知士也甘面墻
九京不可作矍圃嗟荒涼詭遇羨多獲
孤睽眩先張憶昔親扈從此藝推精
強一發貫雙飛萬騎空騰驤歸來東山
卧左肘生垂楊爰求寬平地用作和容
堂德成藝可游教德真義方方今闡文
化盛治卑成康顧乃復事此不使

韃橐藏珍重老成意居安危莫忘

送蕭孚有歸廬陵

并序


先公官衡陽交邵陽羅巨海甚洽巨海宋進士國初
嘗移書文山海上海欲率義以從事覺下獄幾死出不
復輕與人接但為義倉賙族里終其身宋衣冠論人
才不少推讓獨稱廬陵方崖蕭公不釋口且言其分
使安南以不辱稱僉廣西憲出部內賊汚殆盡平生
當事奮前毅然特立力行不惑人譏其過不恤也有

士甫弱冠在侍下數數聞其語承乏御史南臺今平章趙涼國公居晴溪評前御史亦謂方崖最稱蓋涼公昔以治書分臺浙省嘗與之俱劇地抨治尤悉其才曰升字孚有者其幼子也今年冬過予武昌春溫玉潤出所著多可稱予喜為善之有後昔聞之有徵也又悲昔之不識其面而幸今之識其子也孚有歸請曰先公辱知若是不有贈言是升見猶未見也予惟士大夫平居論議若甚可信一躋人上首鼠苟祿

相師成風若翁之力行不惑可謂特立者也乎有惟
父行是式為孝子為忠臣有餘師矣方崖壽才三十
八展布未究而乎有弟兄皆力學撫仕諸孫玉立娟
好天與善不已豐乎巨海行已無愧古隱君子其言
可書也涼公視乎有昆季不替昔好而有壬於涼公
又厚且親是宜有以贈之詩曰

巨川有餘波喬木宜繁陰獲報期百年植德天所歆行
秋號肅物春陽發幽深慶源肆接派玉樹駢書林扁舟

歲年晚天涯有知音江漢霜已冰魚龍駭清吟倚門忽
入夢奈此寸草心遄返固所宜遽別情豈任世業貴繼
脩昭代無陸沈曷哉養器識毫芒矧千尋



至正集卷四